



Daifim

An Official Organ of YMA, Khuangpuilam Branch.

YMA MOTTO



Hunawl hman that
Zofate hmasawwna ngaihtuah
Kristian nundan tha ngaihsan

Khawchin : Source - Accuweather.com



Ruah a sur rin a ni.
Temp - Max: 24°C Min: 21°C
Dar 5:26-ah ni a chhuak ang a,
Tlai Dar 4:39-ah a tla leh ang.

Vol - VI Issue No. - 41

- Sahmulphah Thla -

1st November, 2020 (Pathianni)

Tunkar chang vawn : Thuf. 1:7

"Lalpa tih hi hriatna thuk ber a lo ni,
Mi a-te chuan finna an hmusit a,
Kaihrui theih an ni lo."

TUALCHHUNG CHANCHIN

❖ Vaivakawn Zohnuaia Pu Lalremsiama Varte, Branch Secretary, in luah chu ni 29 Oct, 2020 tuk khan rawk/suam a ni tih hriat chhuah a ni a. Hriat theih chinah Gas bur ruak 1 leh thleng set 2 vel lain, room chhunga bungrua zawng zawng an ching phar nasa hle a ni. A titute hriatchhuah an la ni lo.

❖ Pi Lalrinliani, Chawngbawla Section, chu Nazareth Nursing Home-ah thawhhah avanga hun eng emaw chen enkawl a nih hnuin that lam a pan zel niin thu dawn a ni a. Dam taka a lo chhuah leh thuai kan beisei.

❖ Pu Tlanglawmthanga, Ch-section, chu tunkar hi a in-check-up leh hun a ni a; amaherawhchu, hri leng vangin an kal ngei dawn leh dawn loh a la hriat loh nia hriat a ni. Tluang taka an inentir ngei theih nan i tawngtaipui theuh ang u.

❖ Nizan hmasa khan Pu Laithankhuma (Buanga) factory tihchhiat a ni a, a zu mansak a ni baw. A ni hi man nawn a nih angin a chungchang chu BEC thurel anga kalpui a nih rin a ni.

Daifim chhuak hrih dawn lo

Hri lengin zual lam panin mipuih inkaidarhna a thleng tawh ni a hriat avangin Daifim semtute leh chhiartute him zawkna a nih beisei avangin Daifim chu hun engemaw chen atan khawlchhuta chhuah ni hrih lo mai se tih a ni a. Pdf format-in social media kaltlanga tih chhunzawm zel erawh tum a ni.

Kum khat a tana Daifim man pe tla nghal tawhte chungah lawmthu kan sawi rualin kan duh rengvang nilo, khua rel avanga harsatna kan tawhte min hriatthiapui turin kan inngen a. Tin, lakman la pe tla kim lote pawh a semtute'n a man an rawn khawn dawn a, lo pe tla theuh turin kan inngen a ni.

BEC thutkhawm vawi 6-na

Khuangpuilam the 1st November, 2020 : Khuangchawi thla tahrik ni 23, 2020 zan khan Pu Ricky MS Dawngzela inah Branch Executive Committee vawi 6-na thutkhawm a ni a. Member 15 kalin Pu HD Daniela'n rorel thutkhawm a kaihrui a, Pu Malsawmtluanga'n tawngtaina-a rorel thutkhawm a hlan hnuin Report hetiangin ngaihtlak a ni :-

Secretary Report : BEC rorel thutkhawm inkara hmalakna te -

1. Ruihhlo dona kal zelah factory tih chhiat a ni.
2. Volunteer duty post atan VC-te hnenah Bazar shed dil a ni a, a bang pin phui a ni.
3. Ramri buaiah Branch aiawhin President, Secretary leh Fin. Secretary te an kal.
4. Ramria hliam tuar District Hospital-a an rawn phurh chhoh Tv. Malsawmkima, Vairengte kan nan kan Treasurer in ₹ 500/- a hlan.
5. Tui connection lakna atan tul pawimawh te tihfel a ni a, ₹ 1,810/- sen a ni.
6. Pu Thangkima'n phal takin a tula hman atan thingphaw min pe.
7. Kuang nawrna ke chhia chu kan President-in a thar in a thlak a, hman theih in a awm ta.

Finance/FLS report :

1. FLS hnattlang neih a ni.
2. Tun dinhmunah horn zawng zawng a ri kim thei ta.
3. FLS line chat chhui nan Pu David Lalnunhlma'n Br. YMA hnenah Multimeter min hlan.

Sum dinhmun : Chhiatni fund - ₹ 58,019/-

General Fund - ₹ 36,683/-

FLS - ₹ 13,010/-

Total - ₹ 1,07,712/-

Thurel 1-na :

- a. Covid-19 vanga chhiatni thatni inkaihruihna tihdanglam chungchang ennawn niin, vanduaia thila lumen ngai kan nei anih chuan ei leh in hi fimkhur takin siam thin leh tawh nise tih a ni.
- b. Thlan siam leh tui connection pipe phum hnattlang chu tahrik nii 30 Oct, 2020-ah BEC, Section OB leh Thlanmual Sub-committee chin te neih nise tih a nih angin hnattlang hi neih tawh a ni.

Thurel 2-na : Ruihhlo leh a kaihnawih mante kalpui dan ennawn niin, tahrik ni 17 Sept, 20 zana BEC thurel 2-na in alo rel tawh angin ruihhlo zuar leh a kaihnawih laka fihlim lo chu membership fee leh chhiatni fund pekkir nise a tih angin man tawkte chu pekkir an ni.

Tin, heng ruihhlo chungchanga man tawh te hi man nawn an nih chuan hunbi tuk neia vengchhung a tanga inthiarfihlim tur a hriattir nise tih lungual taka pawm tlan a ni a. Hei hian Lalpianfela h/o Pi Lalbiakdiki te a huam tel ang. Lehkha hi pek a tanga thla khat chhunga inthiarfihlim tura beisei an ni.

Ruihhlo zawrh leh a kaihnawih inhnawih Pu Ronald-a chu kan veng mi leh sa te anih loh avangin kan vengchhung a tanga inthiarfihlim tura hriattir nise tih a ni baw.

Heng a hnuia mite hi ruihhlo mansak tawhte niin, chhiatni fund leh membership fee te pekkir an ni.

1. Pu Lalpianfela
2. Pu Laithankhuma
3. Pi Chhuanthianghlami
4. Pi Vanlalsangi
5. Pu Lalbiakhluna
6. Pu Hminga
7. Tv. Rama

Thurel 3-na : Khuangpuilam Branch YMA a tanga ruihhlo (Phek 2-na)

YMA chu tanpui ngaite tanpuitu a ni. - YMA Kumpuan : Zirna uar

Editorial Board :

Represent: Pu Rotlingpuia
Editor: Pu Ricky MS Dawngzela
Jt. Editor : Pu Lalsiamkima
Treasurer: Nl. Florence Zoremsangi
Cir.Manager: Tv. Samuel Lalpekhlua
Contact No: 9862501858 / 9612691291
9612761781 / 7005494983

Branch YMA Office Bearer

President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoremsangi 9612761781	Financial Secretary Pu Rotlingpuia 9862385193

K o h h r a n H u a n g

CYMA hmalakna

FLS Station - 9612566886

Chawngbawla Section

Leader : Pu F. Lalbiaksanga
96121 55162
Secretary : Tv. R. Lalnunluanga
82599 60032

Vanapa Section

Leader : Pu Lalchualova
87300 99599
Secretary : Tv. Lallawmzuala
87875 41803

Khuangchera Section

Leader : Pu Lalramzaa
76408 95924
Secretary : Pu Zachungnunga Hrahse
76299 69989

Editorial.....

Rilru fim takin aw!!

A hmaa thil awmte zir a, ngaihtuahna seng mi tan harsatna hi a nep/zia thei thin. Chutiang nilo thil lo thleng leh awm dan ang anga hmachhawn liamtu tan erawh harsatna a inthuah chho t̃up thin.

Mi malin a tawn mai ni lo ram pawhin tun hnaiah harsatna neuh neuh a tawng chho mawlh mawlh a. Hripui a leng a, lirnghingin min r̃um th̃aih a, ramriah buaina kan t̃aw̃k leh baw̃k a. Ral hma tawngte an hahin an khawngaihthl̃ak hle mai; chutih laiin, a ven ngai leh vena, mipuite erawh hi chuan ngaihtuahna kan s̃eng tha peih lo ni berin a langa. Kan hlauin kan thinrim hluai a, kan ngainepin kan engthaw̃l leh viau thul. Kan rilru hi a chawlaw̃l kan tidawn nge a nghet lo kan ti ang?

Harsatna kan taw̃k emaw taw̃k lo emaw pawh ni se mihring hian engtik lai pawhin duhthlan tur kan nei reng a. Nunna leh thihna, malsawmna leh anchhia mai ni lo, a tha leh a tha ah te, a tha thlan turawm thlawt loh hun thlengin.

Chu'ng hunah chuan ka duhthlanna hian engtiangin nge hlawkna/thatpuina min thlen ang tih aiin engtiang chiahin nge hlohna/chhiatna min thlen ang tih ngaihtuah zaw̃k a him fo. Bible pawhin thil tha anga lang a tawpa thihna ni leh si a awm tih min hrilh kha.

Tin, kawng tawi leh awlsam ai hian kawng thui leh khawkrawk zaw̃k zawhtute hian hlimna an chang duh zaw̃k fo.

Rilru fim taka che chhuak thin mi chuan hnaw̃k a insiam tlem thin.

Presbyterian : Hriattur -

1. Hri lengin nasat lam a pan leh avangin November thla ãtangin Pathianni tina Buhfai tham khawn tawh lovin thla khat atan vawi khat a sum faiin khawn a ni tawh dawn a. Kohhran hmeichhe committee member leh group O.B-te ruat thin an ni ang a. a khawntu turte pawhin hmaikawr tha taka vuaha inchhung lut kher ngai lova khawn hram dan ngaihtuah tur a ni.
2. Kum 2021-a Women Centre-a puan thui leh puan tah zir duh tan dilna form Pi Vanlalhruii, Bial Kohhran Hmeichhe Secretary hnenah a lam theih a ni.

(Phek 1-na zawmna) leh a kaihnawih avanga inthiarfihlim tura tih te leh Branch dang ãtanga rawn pem tum te chu KPL Br YMA remtihna lo chuan veng chhungah awm a remchang dawn lo a ni.

Thurel 4-na : Pi Chhuanthianglimi, Pu PC Latlanliana (L) nupui, Khuangpuilam coffee mual chuan ni 7 Oct, 2020 tlaia zu mansak vanga membership fee leh chhiatni fund pekkir a nih avangin ngaihdam a rawn dil a. A ngaihdam dilna hi uluk taka sawiho a nih hnuah la ngaihchan rih ni se tih a ni.

Thurel 5-na : Khuangpuilam VC hnen ãtanga faina chungchang a hma la tura ngen leh beisei angin theihtawp chhuah nise tih ni se, a t̃ul angin hruiute'n hma lo la se tih a ni.

6. Kolasib Vengthar ãtanga rawn pem Pu K. Rosangliana leh a chhungte hnen ãtangin Testimonial Certificate dawn a ni.

Electoral Roll chungchang

Integrated Draft Electoral Roll chu ni 16.11.2020-a tlangzarh tur a tih a ni a. Hemi ni ãtanga ni 15.12.2020 thleng khian Electoral roll a ziah luh, siamthat leh paih dilna thehluh hun hawn a ni ang. A t̃ul ang angte siam rem a nih hnuah ni 20.01.2021-ah Electoral roll thar tlangzarh tur a ni.

'Fai hi Pathian anna a ni,' tih inzirtir sakhaw vuantute kan nih si chuan, Pathian ang lo tak tak leh hlat tak tak tur hi kan kat nuk mawi lo maw? Chu mai nilo, ringlotute tan Pathian zawn hmuh pawh a har viau a rinawm.

29.10.2020: Mizoram leh Assam ramri buai chungchang ngaihtuahin, dar 3:00-ah CYMA Office Bearers Meeting neih a ni a; dar 4:00-ah CEC Emergency Meeting neih chhunzawm a ni. Central YMA hmingin thuchhuah siam a ni a. Dar 5:00-ah Mizoram Chief Secretary chu a Office Chamber-ah Central YMA OB ten hmuin, Union Home Secretary hova Mizoram Chief Secretary leh Assam Chief Secretary-te Video Conferencing neih turah All Political Parties leh NGO Co-ordination Committee-te dinna kum 1875 chu nghet taka kalpui turin ngenna an thlen.

Ramri buaina hmuna kala mipuite thlamuan turin Pu Fabian Lalfakawma, Treasurer leh CEC member-te - Pu R. Lalngheta, Pu Peter Chhakchhuak leh Pu K. Darethluanga te Vairengte leh Saihapui V-ah an kal.

No. CYMA 74/2020-2021/2 of 29.10.2020
Central Young Mizo Association
Mizoram : Aizawl

Central YMA Thuchhuak

Mizoram leh Assam ramri buaina kal zelah boruak muanawm a awm tawh tura kan ngaih laiin, Assam sawrkar-in boruak tha lo hring chhuak thei zawnga hma a la chhunzawm zel hi kan dem tak zet a ni. Mizoram mipuite hian kan pi leh pu ten kum 1875-a ramri an lo sah chhuah tawh sa hi kan pawm dan leh kan dinna a la ni reng a ni.

Waviin Khuangchawithla ni 29, 2020 (Ningani) tlai dar 6:30-a Union Home Secretary-in Mizoram leh Assam State Chief Secretary biakhmuhtheihna (Video Conferencing) hmanga a kawm turah hian kan dinhmun chiang taka tarlan ni se, Mizoram chhungah Assam lam mi engemawzat khawsa mek kan neihte himna pawh Central Sawrkar-in ngaihtuah se kan ti. Mizo mipui ten ramria kan pawm hi dinpui tlat turin Sawrkar kan phut tlat a ni.

Sd/-
Prof. Lalnunluanga
General Secretary

Thu ziak Huang

YMA NIH PHUNG BIH CHIAN NAN

YMA hi a dintu Zosap Missionary-ten "Kristian Association" ni tura an lo din, "Isua nungchang ang entir a tum ber a ni" tia pawl kal phung tur an lo duante hi thangtharte hian kan hre thiam ta lutuk lo deuhte pawh a ni ang e. thenkhat ngaih danah chuan pawl thenkhatte anga Pressure Group emaw ti a, sawrkar leh mimal emaw nawr chiam tura ngaihate awm thei a ni a. Tin, tharum hmang mai thei tur pawl emaw tite pawh awm theih a ni a.

YMA hi eng nge a nih chiah, a dintu Zosap Missionary-te hian eng atana an lo din nge? tihte Pawl pian hmang leh a thil tum leh Dan an lo siamte atang hian YMA hi eng nge a lo nih chiah le? tihte YMA tobul bih chian nan hmang ila. YMA kan lo hmel hriat thin dan leh hma a lakna tur atana ka lo beisei dan thinte nen a inrem em? Tihte bih chian nan hmang ila a tha awm e.

A hmasain tun thlenga YMA nih phung kan chhawm chhoh tak hi tar lang hmasa ila. YMA nihna:- YMA chu Politics rawngkai lo tlawmngai pawl a ni, A thil tum leh a din chhan: 1. Hun awl hman that. 2. Zofate hma sawnna ngaihtuah. 3. Kristian nun dan tha ngaihsan. YMA thu vawn:- YMA chu tanpui ngaite tanpuitu a ni, Heng bakah hian YMA HISTORY - Pu C. Vanlallawma ziak atangin Bung 2-na pumpui ka rawn dah chhuak a. YMA HISTORY ziaaktu Pu C. Vanlallawma hi YMA Office Secretary pension ta a ni a. YMA History hi Minute bu hlui base-a a ziah a ni.

YMA hi eng nge maw a lo nih chiah le, i bih Chiang chhin ang u hmiang. YMA HISTORY BUNG 2, YLA A DINGTA

I. Pi Zaii Bangla-ah: Khatia Mission Workers' Conference an tin darh kha fur lai a nih avangin khua a chhe ang reng hle a. June ni 3 (Thawhtan) zan a ni awm e, Pi Zaii Bangla-ah Mission Sapho leh Kohhran hotu thenkhat an lengkhawm a. An tum reng pawh ni hran lovin chumi zan chuan pawl din zai an rel ta a ni. A hming turte an han ngaihtuah a, rei fe an ngaihtuahin an sawi. Thenkhat chuan Young Mizo Christian Association (YMCA) tih te an han rawt a, lungthlukna tak an neih lawk loh hnuin Rev. David Edward (Zorema pa) khan, "Kristian tan bik anga kan tih chuan mi kan hip tawk lo vang a; Wales rama Young Wales Association ang deuh khuan 'Young Lushai Association' i ti mai ang u hmiang," a han ti a. Chu chu lungrual takin an pawm tlang ta a ni. A hawn ni atan June ni 15 an ruat a, an tin ta a.

Hemi zana Pi Zaii Bangla-a lengkhawmte hi Chiang taka hriat ni tawh lo mahse, hengte hi an tel ngeia hriat a ni: Rev. David Edward (Zorema, pa) Upa D. Thianga, Rev.L.Evans (Pu Niara) Upa Chawngzika, Miss K. Hughes (Pi Zaii) Pu Muka, Rev Chhuahkhama, Pu Vankhuma, Pu L.Kailuia B.A, Pu L.H.Liana Upa CH.Pasena. A reltu leh a din chhuaktute han en hian 'Young' han tih awm hmel an awm lem lo. 'Elder' inti awm pui puiin 'Young' an intih nachhan hi eng nge ni le? An sawi danin heta 'Young' hi naupang emaw, tleirawl emaw, thalai emaw ni lovin Mizo hnam an lo sawina a ni, hmasawnna kawng zawha thanglai mek Mizo hnam an lo kawhtir a ni. An mahni ho pawh khan 'Young Lushai Association' hi 'Mizo thanglai' tiin, Mizo tanwngin an sawi ve thin a. Pawl member ni tur pawhin naupan leh upat thuah kum bithliah a awm ngai lo. Waviin ni thlengin hei pawh hi pawl kal dan a la ni zel.

II. Pawl pianhmang leh a tum: Thawhtan zana an thurel chu an hun ruata hawng thei turin an hotute'n an bawhzui ani ang. Heng a hnuaia pawl thil tum leh kalmang turte hi a hmaa lo duan lawk ni ngei tur a ni. Hetiang hian an ziak a. **Dan:** 1. He pawl hi a hming atan 'Young Lushai Association' tih a ni ang.

2. A awm chhan : Tlangvalhoin an hun awlte a tha lama an hman a, an nundante a dik lam leh a hrisel zawnga an neih theihna tura fuihna a ni. Awmdan engkimah Kristian nun dan zuiin Kristian Association angin a awm tur a ni. Isua nungchang ang entir a tum ber a ni. He Association hian inhnialhona te, sawihona te leh lemchan te a ngaihtuah ang. Hriselna lamah infiamna hetiang, Hokey te, Football te, Babminton etc te., neih tur a ni ang. Inchung luma infiamna leh lehkhah chhiar turte pawh neih tur a ni ang.

3. Member nihna : YLA thupui ber 'Kristian Member nihna : YLA thupui ber 'Kristian nun dan' ngaisangtu tupawh he pawlah hian an tel thei ang. A tel man thlatin hnakhath (anna 1) pek zel tur a ni ang. Luh man (entry fee) duli (8 annas) a ni ang.

4. Zu in chungin tumah YLA hmunah emaw, inkhawmnaah a tel tur a ni lo.

5. Mi nungchang mawi lo leh hram tlahawllhte chu member an ni thei lo. Heng dante hi he pawl thatna leh felna humhalh hlen theih nana siam a ni a, khermei taka hman tur a ni.

6. He pawl hi committee-in a vawng ang. Committee te chu President, Vice President, Secretary pahnih, Treasurer leh committee member pasarih te an ni.

7. Kumtin Committee tir thlanna June thla velah a awm ang. Chumi thlangtu turte chu member zawng an inkhawm ang a, an thlang ang. President, Vice President leh Secretary-te erawh chu chu mi ruala thlan that kher tul an ni ve lo.

8. Treasurer-in Committee remtihipuina ang zelin tangka a hmang ang.

9. Assistant Secretary chuan inkhawmnaa thu ngaihtuah leh tih a piang ziaakna a nei ang. (Minute Bu)

10. YLA hi nitin lehkhah chhiarna tur leh infiamna tur tlai 4 – 5:30 a inhawng ang a. Thawhtanni, Thawhlelni, Ningani leh Zirtawpniah te erawh chuan zan dar 9:30 thlengin hawn a ni ang.

11. Inhnialna te, Lemchan te leh Thusawi te a eng emaw tal hi hapta khatah zan khat tal chu tih zel tur ani. Committee-in a ruat zel ang. (YLA hmunpui atan chuan Mission Primary School hi hman a ni rih e).

III. YLA Hruaitu hmasate: A tira an invuah dan chuan Officer an awm a, Committee member an awm a, Sub-Committee member an awm leh a. An inthlang nge an in ruat mai tih hriat a ni lo. Hengte hi an ni a Officer te chu – President – Pu Niara, Vice President – Pi Zaii, Treasurer – Zorema pa B.A, Secretaries – Pu Pasena & Pu Vankhuma, Committee members – Pu Buchhawna B.A. SDC, Pu Sainghinga Head Cleck, Pu Lalkailuia B.A, Pu Thanga, Pastor Chhuahkhama, Pu Hrawva B.A, Head Master Pu Zalawra. Sub-Committee te – Debate & Discussion-ah Pu Vankhuma, Pu L.H. Liana leh Pu Chuaathuama -Lecture & Address-ah Pu Zalawra, Pu Buchhawna leh Pu Zawla, Drama ah Pu Pasena, Pu Lalkailuia leh Pu Chawngzika Newspaper & Magazine-ah Pu Niara, Competition-ah Pi Zaii, Zorema pa, Pastor Chhuahkhama, Pu Sainghinga leh, Pu Hrawva Sports & Games-ah Pu Muka, Pu V.L. Lawma leh Pu Vandailova.

Heng YLA din tirh a pawl ruangam an din dan leh kutke an invuah dan atang hian a thil tum a Chiang hle. Tum ruh takin hmasawnna leh changkanna beihpui an thlak dawn a ni.

Mahni hming thatnan leh langsarh duh vang nilova thawk thinte hi mi ropui zia a ni.

Tunkâr chhunga thil thleng langsâr zual

25.10.2020 : Thingsai Branch YMA te chuan Pi Iangchhini Muallungthu Veng hnenah Huaisen Chawimawina citation an hlan. Pi Iangchhini hian Ni 4.9.2020 (Zirtawpni) khan Tv. Lalfakzuala Muallungthu Veng, Tiau luia a chesual nunna chân mai thei dinhmuna ding chu huaisen tak leh mahni nunna hial thâp ngamin a chhanchuak a ni.

25.10.2020 : Chief Secretary's Conference Hall, MINECO-ah October ni 26, 2020 - November ni 9, 2020 chhunga hman tur "COVID-19 No Tolerance Fortnight" khauh taka hman dan tur ngaihtuahin thutkhawm a ni a, Medical Operational Team on COVID-19 Chairman Dr. ZR Thiamsanga'n he thutkhawm hi kaihruiin Chief Secretary Pu Lalnunmawia Chuaungo, Additional Chief Secretary Pu JC Ramthanga bakah Finance, DM&R, H&FW, I&PR, Home department leh Local Council Association hotute an tel a ni.

26.10.2020 : Chhun dar 12:00 vel khan Hnahtial Addl. SP Pu Bijoy Gurung hmalaknain Hnahtial Police, Thingsai Police, Electricveng Branch YMA leh Lungleng Branch YMA tang ho chuan Methamphetamine mum 39,000 hi manin; a neitu nia puh mi pahni - Lalzamlia (30) Aizawl Tuithiang Veng leh Lalruatkima (35) Aizawl Armed Veng South nia in chhal te an man.

26.10.2020 : Health Minister leh Home Minister hova emergency meeting chuan Chief Minister remtihna 27.10.2020, 4:30 am aţang a 3.11.2020, 4:30 am thleng AMC area ah lockdown a ni tih an puang. Lockdown boruak a zirin a hnu leh zela kal dan tur ngaihtuah that leh a ni ang. Lockdown puanna AMC area bak zawngah COVID19 No Tolerance Fortnight khauh taka kalpui chhonzawm tur a ni.

- Aizawl a hmupui nei 46 Assam Rifles chuan Vaitin khuaah a thlawna inentirna Free Medical Camp an buatsaih a. Free Medical Camp hi 2IC Jacob L Pulamte, Chief Medical Officer, 46 Assam Rifles kaihraina hnuaiah neih niin mipa 42, hmeichhia 74 leh naupang 39 an in entir a, a thlawnin damdawi sem a ni a. He hunah hian COVID-19 chungchangah inzirtirna hun neih a ni bawk.

- Mamit DRDA Project Director Pu HD Lalpekmawia chuan ni 9/10/2020 a Karimganj DC Anbamuthan MP leh Official dang ten sorkar bungrua an tih chhiat chungchang ah Karimganj DC chu in sawifiah turin a hriattir.

27.10.2020 : LPS leh Tribal Power buatsaiha Beat Contest neih tum chu Covid-19 hri darh mek ngaihtuahin him rih lova ngaih a ni a, chuvangin tiam chin awm lova thulh rih a ni.

- Zemabawk kananthar leimin chu ni 21 chhung zet sial anih hnu ah tlai lam khan hawn a ni ta.

28.10.2020 : SRH-ZMC-a Covid-19 vei enkawl mek Sangkhuma (kum 62), Dawrpui, Aizawl chu chhun dar 12:30 khan a boral. Covid-19 vanga Mizorama thi hmasa ber a ni. Covid-19 positive a nih bakah, lung lam natna nei sa a ni bawk.

- Zophai Muslim Biak in a Mizoram IR duty te sawnchhuah an duh avangin Zophai piaha Hailakandi lamin Mizoram a bungraw lut tur an dang a, Sahapui V a Mizo IR duty te sawnchhuah an nih theih nan Lailapur-ah kawng an dang bawk. Saihapui V tlawhtu Cachar DC chuan Saihapui V a Mizo IR te chu lakchhuah an nih loh chuan Mizoram kawng dan a nih dawn thu a sawi a, Cachar DC te hi chawhnu dar 1:00 vel khan Saihapui atangin an haw a, hemi hnu lawk hian Lailapur-ah Mizoram a lut tur Motor dan a ni ta a ni.

29.10.2020 : Sakawrdai khawtlang hruaitute chuan Doctor pakhatin Sakawrdai nula khaikhum tum ah puhin, thuchhuah an siam. "Ni 26.10.2020 (Thawhtanni) zan khan Sakawrdai Doctor, Dr. JH Vanlalnunmawia S/o JH Vanlalnela, Ramhlun North, Aizawl in Sakawrdai Nula pawngsual tum leh thahah hial te vaua a chung a mawilo taka a che ah an puh a ni.

Aarogya Setu app a him tawk

Covid-19 contact tracing tihna atana siam, Aarogya Setu app hmangete tan security a him tawk em tih inhnialna a awm chhoh lai karah, sorkar laipui chuan he app hi a him tawk a ni tih nimin khan a tarlang.

Activist leh organisation thenkhat chuan tun hnai, a bikin Nilaini aţang khan he app hi a him tawk lo niin an sawi nasa hle a, app hmangete personal data chu a humhim tawk loh thu leh he app kaltlang hian sorkar chuan app hmangete hi a en thlithlai thei niin an sawi bawk. Nilaini zan pheikha chuan he app siamtute hi hriat an nih loh thute hial twitter lama post darh a ni.

Mahse nimin khan sorkar chuan hei hi chhangin, Aarogya Setu app hi National Informatics Centre (NIC), industry leh academia aţanga volunteer ţangkawpten an siam a nih thu Ministry of Electronics and IT (Meity) thuchhuah chuan a tarlang. Meity Aarogya Setu app chu a himin, langtlang taka siam a nih thu sawiin, hlauhthawn tur a awm lo, a ti.

Meity thuchhuah chuan, kumin April 2 khan press release leh social media kaltlangin, sorkar laipui chuan Covid-19 dona kawnga mipuite nena an thawhho theihna atan, public private partnership mode hmangin Aarogya Setu app hi a lo tlangzarh tawh a ni, tiin a tarlang. India mithiamte thluak hmangin, 'Made in India' contact tracing app atan ni 21 chhungin he app hi siam a nih thu a sawi bawk. He app siamna kawnga thawktute pawh Open/Public Domain hmangin tlangzarh vek a ni, a ti bawk.

Thlaah khian kan rin aiin tui a tam mai thei!

Thlaah khian kan hriat hin leh kan beisei aiin tui a tam mai thei a, chutiang chu a lo nih hlauh pheikha chuan van boruak chanchin zirna kawngah leh space mission hrang hrangah pawh a ţangkai thei hle ang. Kum 10 vel liam ta lawkah kha chuan Thla hi khoro tak, tui awm miah lohnaah ngaih a ni ųhin a, mahse kum a lo vei a, zirchianna thenkhat chuan a polar region lamah khian vur awmna hnuhma ni awmte hmuhchhuah a nih thu tarlan a lo ni tawh.

Tunah erawh thil thar a awm leh ta a, Thawhtanni khan Nature Astronomy chuan zirchianna pahni tlangzarhin heng zir-chiannaah hian tui tam zawk a awm ngei nia a lan thu leh kalpawh awlsam lam, ni engin a chhun lamah pawh a awm niin an tarlang. Heng tuite hi lakchhuah theih a nih hlauh chuan Thla leh a piaha lam pawha Astronaut-te an zin theihna tur kawnga thil ţangkai tak a ni dawn a, tui in tur awlsam zawkin an neih phah thei dawn niin zirchiannaah chuan an tarlang. Chumai a la ni lo, rocket fuel siamna turin molecule pawh a la thendarh theih mai thei tihte thlengin an tarlang zui bawk. NASA pawhin an ngaihven zui hle a nih hmel a, kum 2024-ah hi chuan Thlaa mihring tirh leh an tum avang leh awmhmun khwar ngheh an tumna kawngah a ţangkai hle dawn nia an hriat vang a nih hmel. Thlaah an lawn hlawhtling a nih chuan a lehpok lamah chuan Mars lam hawi an tum a ni.

Zirchianna hmasaah pawh zirmitte chuan Niin a chhun lamah tui a awm ngei niin an lo hre tawh a, mahse heng tuite hi H₂O a ni nge hydroxyl a ni tih an hre lo thung.

Khawvel aţanga crater hmuh theih Chiang ber Clavius crater-ah pawh water concentration 100 to 400 parts per million ang vel a awm tih hmu chhuakin van boruak chanchin ngaihventute chuan Thawhtannia Nature Astronomy zirchianna tihchhuah hi an ngaihven zui nghal hle a ni.